

Asisko gutuna

2013ko Otsaila. 4. printzipioa. Bidea elkarrekin egin, anaitasunez bizi

52. zenbakia

Asis Sarea eguneroko bizimoduan espiritualtasun frantziskotarra ezagutu edo partekatu nahi duten lagunen sare sozial irekia da.

Gure bilaketa bidea banaka eta pertsonalki egiten ari gara, eguneroko bizitzan bakoitza bere eginkizun eta harremanetan murgildurik. Bilaketa ibilbide honetan Jainkoarekin harremana lantzeko gure aparteko tartetxoak hartuz baita.

Baina noizik eta behin elkartu ere egiten gara. Eta elkartze hori ospakizun bihurtzen dugu. Izan ere elkartzeak gure bilaketa sendotu egiten du, bultzatu egiten du, egiaztatu egiten du. Senidetasunean elkartzeak gure bilaketa espirituala opari ordain ezin bihurtzen digu.

Gogoetarako gaia

Ospatzen duen senide taldea

“Ez gaude ospakizunetarako” esaten dugu egoera larrian, estutasunean, sufrimenduan, ezinean, amorrualdian garela adierazi nahi dugunean. “Ez gaude ospakizunetarako” horrek esan nahi du, ezinean gabiltzala sufrimenduarekin, situazioak azpian hartu gaituela, lur jota gaudela.

Paradoxa handiz gertatzen da, jenderik pobreenak eta sufritzen ari denak, hain zuzen, adierazten duela askotan guri falta zaigun bizipoza. Jende hori gauza da bizitzari zukua ateratzeko, horretarako inondik ere aproposa ez den egoeran. Baztertuen inguruetan lanean dabiltzanek ondo ezagutzen dute ospakizunek duten inportantzia.

Eta hori ez da, inola ere, geure burua “haize hotzari irri eginez” kontsolatzea, baizik eta daukagunaren eta garenaren baliorik sakonena aurkitzea. Egoera zailtan aldatu egiten da ospakizunaren zentzua bera ere, biziari lotuagoa bihurtzen baita, inplikazio gehiagokoa, ez hain inpersonala eta axalekoa.

Bizitza eta bere momentu eta gertaldiak ospatzea,

azken batean, ikasiz joatea da eta ikaste horretan trebatu egiten digu sufrimendua, beldurra eta larrimina zeharkatzeko gai den begirada, eta bizitzaren, harremanen eta ematen zaigun guztiaren balioa ikusteko gai den begirada; ontasuna, edertasuna, doakotasuna, eguneroko harremanen handitasuna ... aurkitzeko gai den begirada; egunerokoan Jainkoaren Misterioaren presentzia sumatuz miresmenez txundituta gelditzeko gai den begirada, are Jainkoaren eskutik joanak diruditen ingurune eta situazioetan ere.

Horrez gain, ez dugu bakarrik ospatzen; besteekin partekatzen dugu geure esker ona, geure gorespena, geure poza. Edo bestela besteek dute gurekin partekatzen eta gaituzte geure baitatik, geure beldurretatik, porrot eta sufrimenduetatik ateratzen.

Askotan geure bilaketa espiritualak eta Jainkoarekiko harremanak zeregin edo egiteko edo are obligazio gisa hartzen ditugu. Baina eskertzen, bedeinkatzen, goresten ... jakitean datza benetako sekretua.

Ebanjelioko pasartea: Lk 15, 25-32

Seme zaharrena soroan zen. Etxerakoan, hurbildu ahala, soinua eta dantzak sumatu zituen. Eta, morroi bati deiturik, zer gertatzen zen galdetu zion. Hark erantzun: «Zure anaia etorri da eta zekor gizendua hiltzeko agindu du zuen aitak, semea onik bereganatu duelako». Biziki haserretu zen anaia eta ez zuen sartu nahi. Atera zen aita eta erreguka hasi zitzaion. Baina hark erantzun zion aitari: «Hainbeste urte da zure agindu bat ere sekula huts egin gabe zerbitzatzen zaitudala, eta ez didazu egundaino antxume bat ere eman, lagunekin festa egiteko; eta, horko zure seme hori, zure ondasunak emagalduekin jan dituen hori, etorri dela eta, zekor gizendua hil duzu». Aitak erantzun zion: «Seme, zu beti nirekin zaude, eta nire guztia zeurea duzu! Baina egoki zen poztu eta festa egitea, zure anaia hau hilda baikenuen eta piztu egin zaigu, galdua genuen eta aurkitu egin dugu!».

Frantziskotar espiritualtasuna

“Zu zara santua, Jainko Jaun bakarra, mirariak egiten dituzuna. Zu zara on, on guztia, on gorena. Zu zara maitasuna, karitatea; zu zara apaltasuna, zu zara pazientzia, zu zara edertasuna, zu zara segurantza, zu zara atsedena, zu zara poza ...” (JaGor 1-2.4)

Asisko gutuna

2013ko Otsaila. 4. printzipioa. Bidea elkarrekin egin, anaitasunez bizi

52. zenbakia

Frantzisko juglare bat da. Ospatzea, gorestea, kantatzea da berea. Izenak sortzen ditu Jainkoa esateko eta ahogozatzeko. Frantziskok badu *nor* ospatu. Jainkoa ospatzen du: Jainkoa den bezalakoa izatea. Jainkoa Jesus Kristogan aurkitzen duen bezala ospatzen du. Liturgia bat sortzen du, Belenen gertatua Greccion ospatzeko, *begiez kontenplatu ospatu nahi baitu*. Frantzisko, Jesus Kristoren heriotza eta pazkoa ospatuz hiltzen da, dena Harekin, bere bizitza eta poza denarekin, bizitzeko.

Frantziskok, Jainkoari begiratzeaz begiak argiz eta harriduraz beteak dituelako, ospatu egiten du. Eta itsu dagoelarik ere, begi horien bidez sortzen du *Anaia Eguzkiaren Kantika*, pozez ospatzen du eguzkia eta ilargiaren, argi handi eta txikien existentzia, beroriek Frantziskori Jainkoaren distira hainbeste gogoratzen diotelarik; pozez ospatzen du ura eta ongari, xume, apal eta garbi den guztia; pozez ospatzen eta eskertzen, hainbat pertsonak barkatu egiten dutela maitasunagatik, *zure* maitasunagatik. Frantziskok, besterik gabe, Jaunaren juglarea izan nahi du.

Otoitza

Eskerrak, Jauna, ematen didazun Biziagatik, oparitan emandako momentuengatik, niretzat egitasmo eta plan bat baduzulako: eskerrak, Aita, ZUGAN naukatzulako. Eskerrak nire gaitasun, talentu eta dohainengatik; laguntza ditut Zure eta besteen artean zubi izateko. Eskerrak, halaber, nire hutsegite, zalantza, zailtasun eta mugengatik; berorien bidez irakasten didazu, Zure Eskuetan soilik dudala izatea eta zentzua. Eskerrak nire bakardadeagatik, baita nire afektuengatik ere, zeren eta besteekin gurutzatze horretatik bizi-esperientzia berriak ditut aurkitzen.

Eskerrak, amets berriak, proiektu berriak eta argi berria ematen dizkidazulako, zure eskutik askatzeagatik hainbeste iluntasun izan ondoren. Eskerrak, ni aurkitu, zaindu eta babesteagatik, beti zure besoetan naramazulako. Eskerrak, nigana beti etortzeagatik, baita ni zugandik urrundu naizenean ere, eskerrak maite nauzulako, zuk bakarrik maite nauzun bezala; eta nire bihotza aldatzeagatik, hura zure maitasunez betez. Eskerrak, Aita, Biziaren Jainkoa, bizirik egoteko mirari handiagatik.

Gutuneko azken hitzak

“Zeinen txikiak diren nire eskuak biziak eman didan guztiaren aurrean!”


2013ko martxoko eguneroko Ebanjelioa

Egunero Ebanjelioa irakurri nahi duten lagunek, egun bakoitzari dagozkion irakurgaien arabera, hemen daukate martxoko erreferentzia guztiak:

1 Mt 21,33-43.45-46	6 Mt 5,17-19	13 Jn 5,17-30	20 Jn 8,31-42	27 Mt 26, 14-25
2 Lk 15,1-3.11-24a	7 Lk 11,14-23	14 Jn 5,31-47	21 Jn 8,51-59	28 Jn 13,1-15
3.Lk 13,1-9	8 Mk 12, 28-34	15 Jn 7,1-2.10.25-30	22 Jn 10,31-42	29 Jn 18,1-19,42
4 Lk 4,24-30	9 Lk 18,9-14	16 Jn 7,40-53	23 Jn 11,45-57	30 Lk 24,1-12
5 Mt 18,21-35	10 Lk 15,1-3.11-32	17 Jn 8,1-11	24 Lk 23,1-49	31 Jn 20,1-12
	11 Jn 4, 43-54	18 Jn 8, 12-20	25 Jn 12,1-11	
	12 Jn 5,1-3.5-16	19 Mt 1,16.18-21.24a	26 Jn 13,21-33.36-38	

Geure web gunea bisitatu

www.asissarea.org



Asis Sarea

646 21 48 96